

Wem iss die Kerb - de Leit?

Vor e paar Daach habb ich en Brief kriecht von de Vize-Kerweborsch. Die hawwe mich unn aach onnern Vorständ von Kameradschafte oogeschiwwe, mir solle doch bei de Kerb diesjohr mettmache, mir wärn doch aach emol Kerweborsch gewese unn es wer doch schee, wenn mir beim Kerweumzuch mettmache dete.

Dess mussde derr emol vorstelle - so ahle Kerl wie mir dete hinner unserne Fohn herlaafe unn dete „Kerweborsch sinn lusediche Brieder“ singe! Die Kapp det gar nit mehr basse, die Schärp det iwver unserm dicke Bauch grad aussenonnerplatze, unn de oone von uns humpelt, de onner hickelt unn ich det mettem Stockscherf winke - naa, noch nit emol beim Fassenachtszuch dete merr so ebbes mettmache.

Awwer doo könnt merr doch grad saache, sie mache sich halt Gedonke, die Vize, unn wolle was gonz Neies mache - weeche de Leit, dass die widder ferr die Kerb begeistert dete werrn! Unn deshalb misst wie alles so aach die Kerb gonz onnerst wie vorsjohr unn onnerst wie frieher gemacht werrn.

Naa, ihr Buwe, mett ahle Kerweborsch unn kloone Kinner die Kerb belewe ze wolle, dess kann nit gehe: dess hott koo Tradition, dess iss nit Brauch unn dess werd aach kooner.

Ich denk merr, dass es besser iss, mett wenich, awwer echte Kamerade die Kerb ze feiern, en Umzuch ze mache, ze trinke unn ze singe; die Leit ringserum, die brauch merr nit, die hawwe aach all onnern Sorche. Moi Kamerade unn ich - unn unser Kerb iss schunn bald fuffzich Johr her - erzähle nit von de Leit, die nooch uns geguckt hawwe, mir erzehle immer noch doodefoo, wie ooner von uns midde uff die Strooß gesch... hott unn mir hawwe unser Kerwefohn um en erumgehalle, dassen kooner sieht unn hawwe gesunge: Ich hatt einen Kameraden!; mir erzehle immer noch von de Drummele unn Trompete, mett dene mir wochendaachs dorsch die Strooße gezoche sinn; von de Rose aus Babier uff unserne Bien im Herrsch unn uff unserm Kerwewaache unn von de lusediche Weiwer aus de Brennergass, die uns beim Roseknippele geholfe hawwe – dess, ihr Buwe, ihr Männer, unn die Kameradschaft unnernonner iss uns vun unserne Kerb gebliwwe, dess nimmt uns kooner ab.

Unn so ebbes wär auch ferr eich, ihr Vize, was Neies – denn wem geheert die Kerb? Eich unn koom onnern!

Eiern Honnes